

新制靈臺儀象志

新製靈臺儀象志序

夫古帝王憲天出治未有
以欽若敬授爲兢兢也皇古
以前可不論已若夫堯典置
閏餘而定四時紀七政而明
天度必在璿璣玉衡以齊之
者誠以厯必有理與象與數

而儀器卽所在首重也夫儀也者厯之理由此得精焉厯之法由此得密焉度數之學實範圍於此而莫可外焉矣聞之古人每遇交食分至及五緯凌犯諸變異乃始靜悟於心繼必詳錄於策而猶恐

考驗之無憑也乃復法象而
製爲器以其次年之所測較
勘於前年之所驗者推而廣
之接續成書精確不刊以貽
來世使後之學者師其意而
不泥其跡則凡諸厯諸數靡
不可因之而有所考究焉且

曆者歷也言其歷久而常新也夫歷世愈遠則其理愈精而其爲法乃愈密然非器之有合乎法又烏從闡微抉奧使法極其密而理極其精乎且夫天距地之遠者幾何日月五星各列本天而各天有

上下層次及遠近相距一定之度列宿諸行之細微與夫七曜各有本道而諸道各有南北不同之兩極又各有本道所行各與地遠近與其行最低最高之處皆各有定期又皆各有本體一定之度分

五緯各有遲疾順逆諸行之
不同亦有留而不行之定日
凡此象數萬端難以測量之
際要皆恃儀象而爲之準則
焉故作厯者舍測候之儀而
欲求厯之明效大驗蔑由也
是以稽厯者必以儀爲依據

明歷者必以儀爲記錄失推
者必以儀而改正美合者必
以儀而參互較歷者非儀無
由而信從學歷者非儀無由
而啓悟良法得之以見其長
敝法對之而形其短甚哉儀
象之爲用大也如康熙四年

間挺險之徒出而恣謔其邪
說以俶擾乎天常數年之內
或以大統或以授時或以回
回諸家之舊厯點竄遞更茫
然無措甚之倒用儀器強天
從人乃以赤道儀測新法黃
道之所推步而厯典於是大

壞矣康熙七年戊申冬十有
二月洪惟我

皇上

乾綱獨運

離炤無私特下

明綸有厯法關係重大着議政王
貝勒大臣九卿科道掌印不掌

印官員會同確議具奏之

旨隨蒙會議

題請卽奉有着圖海李爵多諾
吳格塞布顏明珠黃機郝惟納
王熙索額圖柯爾科代董安國
曹申吉王清葉木濟吳國龍李
宗孔王曰高田六善徐越等太

測看之

旨越明年己酉春正月初三日是

日立春諸公卿銜

命僉同視測隨蒙

議政王大臣會

題䟽內有奉

旨差出大臣赴觀象臺測驗立春

雨水太陰火星木星南懷仁
測驗與伊所指儀器逐款皆
符吳明烜測驗逐款皆錯南
懷仁測驗既已相符應將康
熙九年一應厯日交與南懷
仁推筭等語隨奉有南懷仁
授欽天監何官着禮部議奏

之

旨是年秋八月復蒙部議新造儀
器併安設臺基俱炤南懷仁
所指式樣奉有依議之

旨仁自受

命以來夙夜祇懼畢智竭能務求
精乎儀象之有利於用而以

密測天行貽爲典則此愚分
之所矢素心自盡者也雖然
儀象之作蓋以定永遠之明
徵而使後世有以私智自用
者無所騁其臆說則其事可
易言也哉是何也夫諸儀有
作之法有安之法有用之法

三法備而後諸法可次第舉也况夫測天之儀貴恰肖乎天本然之象故其造法亦必以天象爲準但廣大莫如天也覆冒無外輕清莫如天也健駛難形堅固微妙莫如天也運行終古而無虧經緯秩

然而不紊使非會通而得其
全乃漫云吾以制器也則必
得此而失彼挂一而漏萬竊
恐廣大輕清堅固微妙之四
者未有能兼備而無遺者矣
說者曰儀之體制鉅則合天
爲易固已然所謂鉅者其徑

線長週面闊也則度數易分
而分秒之微亦易見然其體
鉅則勢必不能輕巧而若少
用其銅亦作徑長面濶之形
則又必薄弱而不適於宜矣
故特舉輕重學之數法并五
金堅固之理以詳其用焉然

諸儀應天道之度分南北兩
樞又列春秋二分冬夏二至
先後皆有常期黃赤二道地
平天頂子午過極過至過分
諸圈彼此相交於一點細微
之內而各道各圈之中心又
必同歸於一天體之中心而

不使其毫髮之或謬斯已也
但儀爲小天之形未免拘限
要能合符天象無所過差此
其作儀之難者一也今諸儀
已成界線布星固稱詳密矣
然又使安置無法則窺測不
靈而儀亦歸於無用矣此其

安儀之難者二也且古來皆
重正南之向然或稍偏東西
則何所取以爲定如勝國先
所營觀象臺在當時作者以
爲諸儀正對之規模萬向之
標的由今察之其正面方向
正南北線已多乖違何論東

西與上下左右哉蓋儀中各
道各圈各極各經緯之度分
在天固有相應之元道元圈
元極元經緯之度分也彼此
互相照應者也假有一端之
不應則測候卽有不合者矣
然安定正對之法旣得矣苟

用之未能通變反誣良法有
不合天者此其用儀之難者
三也世更有未嘗用儀窺測
妄云星緯間有錯行而不知
天度有一定之理儀象爲證
天之器間嘗出所撰著已辯
其誣而

進呈於

黼座矣乃今之所聞者亦惟明夫
諸儀之用法以及於推測之
所施蓋欲使學者由器而徵
象由象而考數由數而悟理
有所依據而盡心焉用以歷
久遠而世禪夫義和恢恢乎

其有餘矣嗟乎自漢迄元改
厯者七十餘次而創法者十
有三家其間剗造儀象者指
不多屈焉不可以見其難也
哉仁不敏深懼厯學之不明
乎世而敬於

昭代新創之諸儀逐節申明演

爲解說精粗兼舉細大不捐
而復圖之以互相引喻總以
期乎理精法密不愧傳流以
無負

聖天子欽若敬授垂憲無窮之至
意也云爾予小臣敢自多其
力與謹序

皆

大清康熙甲寅歲日躔姬訾之次
治理厯法極西南懷仁揆

欽天監治理厯法臣南懷仁謹

奏爲恭際

欽造之儀象告成益幸合天之厯法有據謹按
器闡明著有書表繕塵

御覽以光

國典事竊惟古帝王之治厯所以正天運定
歲功而節宣和氣爲布政敷化之基誠爲
邦之首務也粵稽堯之命羲和也則曰欽
若昊天厯象日月星辰敬授人時而舜於

受命之初在璿璣玉衡以齊七政蓋以爲
治莫大於明時明時莫先於觀象觀象莫
先於制器虞書之文可考也迨於後而其
制蕩於秦火西漢以來改厯者七十餘次
制法者十有三家而其中肇造儀象者不
多概見卽間有所創鑄或造於一時之用
而不能經遠或合於一事之宜而無當全
用制器尚象蓋若斯之難也我

大清奉興定鼎膺厯數改正朔簡用新法命爲

時憲厯頒行天下事事密合天行故修政
厯法先臣湯若望屢奉

世祖章皇帝恩綸褒美將所進呈厯指諸書宣付
史館新法之善於斯概可覩已然厯法雖
已久行猶未鑄有儀象於康熙四年內忽
挺險之徒出而撓亂成憲妄用弊法迄于
四載矯誣天常曆典大壞幸我

皇上乾綱獨運洞察臣之所推驗與天密合者
爲是復用時憲新法續蒙部議新造儀器

併安設儀器臺基應聽工部俱照南懷仁所指速造奉有依議之

旨欽此以部臣之庀材督造並臣之指授嘔心以及監員之畢力供事今工已次第告竣業將諸儀安列於觀象臺上自是諸儀參互並測於以順天而求合當無有弗合者矣然厯有理有數有象有器蓋厯非明夫理則外而理非數則無以顯其微數非象則無以通其變象非器則無以得其精則

今之諸儀是器也而理與數與象咸寓焉
故諸儀有作之法有用之法有安定與夫
一切運動堅固之法凡此非見諸發揮精
粗具舉則是惟臣知之而人不知豈所以
公諸天下而垂永久之意乎以故融貫舊
聞抒以心得覃精研慮縷析條分而且推
類旁通繪圖比切有說有表次爲一十六
卷名曰新製靈臺儀象志要使肄業之官
生服習心喻不致扞格而難操傳之後世

亦得憑是而有所考究焉此臣之所爲仰
荅

皇上委畀以典歷之命而盡愚分之所當然也
洪惟我

皇上聰明天縱

聖學日新則此象數之言實有切于治歷明時
之學以之敷陳

黼座而備

乙夜之觀其於

皇上欽若授時之治未必無補

高深於萬一也謹茲繕寫編次成帙恭進

御覽抑臣更有請焉是書理數兼明圖表備載
焚然其不齊也鈔謄不易繪畫爲艱使非
版行勢難盡人而給且無以遺久仰祈

勅部鑲版一副交臣印刷以資給發官生則守
是業者皆手習一編而無闕如之憾矣至
於與事諸員皆急公勤慎克底有成伏望
我

皇上憫其微勞量加優叙以鼓後效則亦

國家酬庸激勸之典也臣從厯法起見字多
逾額如果芻蕘可採伏乞

睿鑒施行臣謹將所著書表稽首

進呈臣無任悚仄屏營之至爲此具本親齎

具

奏以

聞

康熙十三年正月二十九日具奏二月初

三司奉

旨。歷法天文關係大典。據奏儀象告成製造精
密。南懷仁殫心料理勤勞可嘉。着從優議叙。
具奏餘着。一併議奏。該部知道。書圖併發。

新製靈臺儀象志目錄

第一卷

新製六儀

黃道經緯全儀

赤道經緯全儀

地平經儀

象限儀

紀限儀

天體儀

窺表

地平儀之用法

象限儀之用法

紀限儀之用法

赤道儀之用法

黃道儀之用法

第二卷

諸儀之用條目

地平經緯儀之用

紀限儀之用

赤道經緯儀之用

黃道經緯儀之用

天體儀之用

新儀之適於用

新儀體鉅極分秒之明晰

新儀分法之細微

新儀堅固之理

新儀輕重比例之法

新儀之重心向地之中心

新儀座架之法

製儀之器與法

新儀運用莫便於滑車

新儀用輪相連以便運動

新儀用螺旋轉以便起動

第三卷

新儀安置之法並摘指南針之誤

大地之方向并方向之所以然

辯指南針之偏于東西而不合于南北之

正向

真正南北向之線

黃赤二儀安定之法

地平經緯儀並天體儀安定之法

測地半徑之法

測地面上高庫遠近表

地面及水面上測經緯度法

大小圈度相應表

測地經緯及方向表

地面上度分變爲里數表

第四卷

驗氣說

測氣寒熱之分

測氣燥濕之分

諸曜出入地平蒙氣廣度差表

氣水等差表

論飛葭之無合于曆

測中域雲之高度

測空際異色及虹霓珥暈諸象

測水法

垂線球儀

第五卷

天體儀恒星出入表

時刻之分及赤道地平分相應表

赤道變時表

太陽及諸曜出入地平廣度表

第六卷

地平儀表

北極出地二十
二度至三十度

第七卷

地平儀表

北極出地三十二度至
三十九度五十五分

第八卷

黃赤二儀互相推測度分表

自降婁宮
至最皆宮

第九卷

黃赤二儀互相推測度分表

自未宮
至申宮

第十卷

黃道經緯儀表

自降婁宮
至鶉尾宮

第十一卷

黃道經緯儀表

自壽星宮
至氐營宮

第十二卷

赤道經緯儀表

自初度至一
百七十九度

第十三卷

赤道經緯儀表

自一百八十度至
三百五十九度

諸名星赤道經緯度加減表

第十四卷

增定附各曜之小星黃道經緯度表

增定附各曜之小星赤道經緯度表

黃道度天漢表

赤道度天漢表

新製靈臺儀象志卷之一

右監副劉蘊德

筆受

治理歷法極西南懷仁著

春官正孫有本

秋官正徐瑚

詳受

新制六儀

夫儀者。歷法合天與不合天之明徵也。故測驗天行。儀愈多愈精。而測驗乃愈密。蓋凡天上一星。所歷時刻。雖躔有一定之度分。然以儀相對而測之。則必與天上東西南北之各道。

有上下左右遠近之分焉。故測驗其星所躔之度分。必依各道之經緯度分而推測之。始無所舛。是則欲爲密合天行之厯法。而非有備具密合天行各道之儀。厥道無由也。如康熙己酉八年正月初三日。是日立春。內院大學士圖海李蔚諸鉅公名卿。奉

旨同視測驗立春一節。於本日午正。仁測得太陽依象限儀在地平上三十三度四十二分。依紀限大儀。離天頂正南五十六度十八分。

依黃道經緯儀。在黃道線正中。在冬至後四十五度零六分。在春分前四十四度五十四分。依赤道經緯儀。在冬至後四十七度三十四分。在春分前四十二度二十六分。在赤道南十六度二十一分。依天體儀于立春度分所立直表。則表對太陽而全無影。依地平所立八尺零五寸表。則太陽之影長一丈三尺七寸四分五厘。六儀並用而參互之。而立春一節。皆合于預推定各儀之度分如此。則歷

凡所推之筭氣其合于天行無疑矣。然非籍有合法之儀。又何從測而得之。夫所謂儀之合法者。抑豈憑臆而強就之也哉。要皆法其本然之象耳。蓋混天之體。原有赤道。有黃道。而居乎渾天之半者。曰地平。經緯分焉。故因其本然之象。崇而效之。制有三規。一曰黃道經緯儀。一曰赤道經緯儀。一曰地平經緯儀。地平儀又分爲二。一曰經儀。一曰緯儀。卽象限儀。使用故也。凡日月五星二十八宿之行。以及所躔之度分。摠于此三

規而推定焉。四儀之外。又有百游之紀限儀。旋轉盡變。以對乎天。凡有或正交。或斜交。于三規錯綜之行。以定諸星東西南北相離遠近之度分。不差纍黍。揔之天行七政于本圈所列之經緯。各道之宮次度分。諸星先後相連之序。與夫東西南北相距之遠近。皆從天體而見。瞭如指掌焉。故制六尺徑之天體儀。以爲諸儀之統。且此六儀相須並用。則凡礙之于彼者。而有此以通之。則亦何求不得哉。

故欲密測以求分秒無差。則必六儀互用相參。要以製器精良。安置如式。測驗得法。而無有不合者矣。其有不合者。則卽推其所以不合之端何在。而更爲釐正之。使釐正之後。測復參差。則于諸儀中擇其所測之同者而用之。如此而不密合乎天行者。未之有也。使止據一儀以求盡乎天。如舊法之簡儀是。何可信其爲必然也哉。蓋舊法黃赤儀。膠柱而不運動。況止可謂赤道儀。無黃極。無緯圈。無黃

表無測黃道經緯之正法。其天頂立圈。太近于地平。其窺表不能測在地平相近之星。夫天球而既無星距。無黃道等圈。無宮次之分。其地平無度數。則器總歸于無用矣。考古圭表之法。其圭原偏而向地平。其表更偏而離天頂。又離正南北之線。故仁以勾股之法修正之。庶幾可免夫乖舛也已。

黃道經緯全儀

諸儀通用之法。已詳於前說矣。今更以諸儀所需全法而分論之。夫儀之設有諸圈。所爲相須而互用之者也。然圈少則不雜而儀清。其象更爲昭顯。而儀之用爲愈便焉。如黃道經緯全儀之圈有四。各圈之四面。分三百六十六度。每一度。細分六十分。其外大圈。恒定而不移者。名天元子午圈。其外徑六尺。其規面厚一寸三分。其側面寬二寸五分。此圈之內。包

括諸圈。其衝天頂之下半。加寬一寸五分。而夾入於雲座仰載之半圈。見第一圖欲其不薄弱而失圓形故耳。其圈之側面。從天頂起筭。南北各去頂一象限。卽爲地平線。又從地平線起筭。上下安定。

京師南北兩極之高度分。於兩極各安鋼軸。而各軸之心與圈側面爲一點。側面爲下半圓而合之。加伏兔上之半圓以收之。蓋因度分之界。指線所切。窺表所及。皆在側面故也。南

北兩軸相向。左右上下。纖毫不謬。子午圈內。次有過極至圈。南北赤道兩極。各以鋼軸相貫之。兩極在規面之中心。而中心內外有鋼孔。鋼軸入鋼樞。免致銅樞磨寬。其北鋼樞。則安于內規面。用小鉄條以貫之。而過極圈不致垂下而失圓形矣。其南鋼樞。則安于外面。不令銅面轉磨而離於儀之中心焉。又從南北赤極起筭。各去二十三度三十一分零三十秒。定黃道極。去極九十度。橫置次三圈。各

黃道圈與過極圈相交。

過極圈亦名帶黃道圈。

兩交處。

各陷其中以相入。令兩圈爲一體。旋轉相從。黃道交。一在冬至。一在夏至。黃道圈內。安次四圈。名黃道緯圈。結于黃道南北之兩極。其鋼軸鋼樞之安法。皆與帶黃道圈無異。夫子午圈內。共三圈。各規面之寬。約二寸五分。便于刻度分秒。其厚約一寸三分。緯圈南北兩極。各有獸面以啣圓軸。其圓徑約一寸。以爲徑表。軸之兩端。有螺柱定之。若欲不用圓軸。

卽開螺柱而安徑線以代表任意用之其軸
之中心立圓柱作緯表表之縱徑與黃道中
線正對下與緯圈側面恒定爲直角而黃道
經圈緯圈各有游表數具于各弧之上游移
用之又當天頂設極細銅絲爲垂線下置垂
球至下圓孔之內全儀下有雙龍于南北兩
邊而承之龍之後足安置于兩交梁兩梁則
以斜角相交而收歛之令其地寬裕而便于
測驗又交梁之四角有四獅以頂承之而上

則有螺旋定之。

黃道圖。其一側面。分刻十二宮。每宮三十度。其一側面。分刻二十四節氣。每節十五度。內外規面宮度節氣分相應之。但規面比側面寬大。便于刻度分秒。其每度之所容者。以縱橫線界之。而成長方形。每一方。又分六小長方。卽一度。分六分也。方上下橫線短小。難容細分。因用其對角長線而十分之。蓋規面上平行十圈線。與對角線縱橫相交。每小方分

十格六方六十格。因以六對角線十分之比例。每一度分六十分矣。諸圈內外規面之度分皆如此。今游表之指線平分十分。與對角線之分。各有相當之比例。每一分。又四細分。而每一細分。當度分之十五秒。因而一分。分六十秒。一度。共有二百四十細分云。

過極至圈。內外規面從赤道線起算。向南北之兩極。則赤道線爲初度所從起。而兩極各爲九十度。其兩側面之度數。則以兩極各爲

初度所從起。而赤道線爲九十度焉。緯圈之
度數亦然。內外規面。以黃道中線爲初度所
從起。而南北兩黃極。則爲九十度焉。其兩側
面之度數。則與過至圈兩側面所起之度數
同也。

赤道經緯全儀

赤道儀之有三圈。外大圈者。天元子午圈也。其
徑線其四面寬厚。其分割度分之法。並堅固
其下週之小半。而夾入於雲座半圈之內。皆
與黃道儀之外圈同。又從圈之側面。南北極
定度起筭。各去九十度。定爲赤道經圈。見第二圖
與子午圈相交之處。兩處各以十字直角相
交。其圈之內面與外面。各陷其中以相入。令
縱橫于兩內規面皆平面。則兩圈皆爲一體。

而恒定不移也。次兩圈內之赤道緯圈。管子
赤道兩極而東西游轉橫相切于赤道之經
圈也。經緯兩圈之規面其寬各二寸五分。側
面厚一寸三分。而南北兩極安定緯圈其內
外之規面上下安以銅軸銅樞諸項皆與黃
道同法焉。又南北兩極各有獸面安定于緯
圈內規面之中。而獸吻嚙其圓軸以代赤道
經表軸之中心。立有圓柱以代緯表。又軸及
柱之徑各一寸一分。若欲以兩極之徑線而

代爲經表用之。亦無不可者。緯表縱橫有兩
徑線。其縱徑與赤道圈之中線正對。其橫徑
與緯圈之側面恒平行。又赤道內之規面并
上側面。刻有二十四小時。以初正兩字別之。
每小時均分四刻。二十四小時共九十六刻。
規面每一刻平分三長方形。每一方平分五
分。一刻共十五分。每一分以對角線之比例。
又分十二細分。則一刻共一百八十細分。每
一分則當五秒。今游表之指線亦平分。而每

分與對角線之十二分。各有相當之比例。又各細分五秒。則一刻每分六十秒。十五分共九百秒矣。如此而分之法。可不謂微矣乎。又子午圈向東之正面。爲子午線所從起。而南與北兩軸之中心。正與此面相對。以爲分界。至若軸樞之半。在于此面。而半在于伏兔。則兩合螺柱以定之。而并如一體焉。又赤道之上側面。于子午圈之正南交。劃有午正初刻。其內規面。劃有子正初刻。而于正北交。則側

面劃有子正初刻。其內規面。劃有午正初刻。其餘時刻。皆從之而定焉。且上則用緯圈。下則用表景。隨便可以測定時刻也。若夫赤道圈之外規面。分三百六十經度。從規內面卯正相對之線起筭。自西而東。隨諸天行。每一度。依上法作長方形。每一方。又另分六小方形。每一分以對角線之比例。又分十小分。卽一度共六十分。今游表之指線。亦分十空之界線。而每一分空內。開爲四格小空。每一格

當十五秒。則四格共六十秒也。其赤道之下
側面。分象限而四之。而子午卯酉爲各象限
之初度。至于緯圈四面列度分秒之法。與赤
道經圈無異。蓋各面四分象限。而內與外規
面之象限各度數。則從赤道線起算。向南北
兩極而止焉。其上下側面之度數。則從兩極
起算。向赤道中線而止焉。又經緯圈各有儀
表者四。與黃道儀正同。而全儀則下有一龍
以爲座。向正南而負之。其前後兩爪安于兩

交梁而兩梁又以斜角相交其四角則有四
獅以相負而又各有螺柱以定之諸類皆詳
於黃道儀解內茲不復贅其安對之法則以
天頂之垂線爲定也

地平經儀

地平經圈之全徑長六尺。而周弧之平面。則寬二寸五分。厚一寸二分。東西南北劃象限而四分之。每一象限則爲九十度。每一度依前法六十分。度數之字。以南北界線各左右起筭。爲初度之界。以東西界線爲九十度之界。從東西向南起筭。北反是。夫地平圈之四面。各有一龍以頂承之。見第三圖而四龍安于十字交梁之四角。而每角加螺旋轉一具。可以準

儀而取平。又十字交梁中有立柱。與地平圈
高等。其中心爲地平圈之中心。從圈之東西
二方地平之圈上。又各另加一立柱。高約四
尺。柱之周圍各有一龍。蜿蜒于其上。乃從柱
之上端中各出其前一爪而互捧火珠。蓋珠
之心爲天頂。而正對地平圈之中心。則從地
平之中心至天頂有立軸。而立軸之中開有
長方孔。其中從上至下有一直線。爲立軸之
長徑線。并爲天頂之垂線。過地平之中心。加

有平方尺表。如窺衡然。自橫表之兩端各出一線而過天頂。與立軸之長徑左右各作三角形。三線互相參直。其在過天頂圈之平面上。而與窺衡之指線準合。夫立軸左右旋轉。則人窺測之目及某星并過天頂三角形線參直。而窺衡之指線指定地平之經度矣。此儀之細微。不止于地平之分法。而更在乎地平中心所出立軸之徑線。準合于天頂之垂線。毫末不離也。故依勾股法之理。先自地平

之中心。劃地平大圈。然後以立軸中天頂線
爲股。以大圈半徑爲勾。而自本圈相對之四
處。斜立一堅硬界方。至天頂線之一點。以爲
勾股之弦。若四處之弦長皆一。而纖毫不差。
則立軸之中線必合于天頂之垂線矣。其說
詳載幾何原本第一卷第四題。又儀之輕巧。
在于四方螺旋之用法。詳于儀
器安法又在于地平
方尺之橫表。蓋此橫表。須厚一寸而寬一寸
五分。以免致于垂下。而不合乎儀之本徑也。

但既厚且寬。則必過重而難以轉動。又轉動時則沉重。而壓磨于地平上所劃度數之細分。故特用螺旋柱管其中心。與地平之中心。少起橫表之兩端。使之空懸于中。而不令其磨損地平之面云。

象限儀

象限儀者。蓋用之以測高度者也。亦名地平緯儀。然式雖不一。惟取其有適于用焉斯得矣。

見第四圖夫象限爲立運之儀。其製法。直角爲心。

六尺爲半徑。用規器劃圓四分之一分。則爲九十度。每一度爲長方形。每一方又分十二小方形。而各小方之底。以對角線之比例。上下五分。則一度共六十分。又對角線之五分。每以窺表指線之細分十分之。則一度共六

百分而每一分則當六秒也。夫所劃之度數之字。其從上起等以至下而鐫于弧之內邊上者。卽指星之在地平上若干度分也。其從下起等以至上而鐫于弧之外邊上者。卽指星之離天頂若干度分也。故八十正數與一十倒數七十與二十六十與三十等。向上向下正倒之數俱爲同線鐫識之。弧以內象限空餘之地爲區龍以充其內。而左右上下皆固已。然全儀須立軸以運之。其安立軸之法。

其要有二。其一。儀形必依權衡之理分之。卽軸之周圍輕重相等。而取其運動之便。蓋儀形之中心。與其重心不同故也。其二。須立軸之中線。與儀之立邊平行。以免致離于天頂之垂線也。又于儀之縱橫兩邊相遇之處。卽過天頂圈之中心。定有圓柱爲表。加窺衡。而衡之下端。依法另加長方孔之表。與上表相等相對。其指線于弧之正面指定所測之度分。任意上下進退之。而于弧之背面用螺柱

以定之。若用象限全圈之徑以爲衡。而衡之
兩端立圓柱以爲表。則可得負圈之角。而倍
加度數之細分也。蓋此二度相併。歸于一度。
而此一度。共有一千二百分焉。立運儀左右
有兩立柱。其兩柱之上有雲弧。下橫一梁相
連。如樓閣然。又立軸之兩邊。有雙龍扶拱。以
爲座架。立軸之兩端。加以銅樞。上下各以銅
孔受之。其在下橫梁中有銅環。以承立軸。樞
環之徑。四倍于樞之徑。環之三百。各加螺柱。

橫入于環。出入展縮。以進退樞。令就合于垂
線也。座架四傍上下。無所隔礙。窺測者。從立
軸以左右旋轉。甚便周視也。

紀限儀

紀限儀之全圈。則六分之一。卽六十度之弧也。

亦名距度儀。全儀分之爲二。一幹一弧。見第五圖

幹之長。與弧之半徑。及弧之通弦。皆相等。卽

皆六尺也。弧之寬二寸五分。此儀之難製。在

于其幹。何也。蓋用儀之時。其幹大概離天頂。

而左右上下移動之。衡斜向地平。故幹愈長。

愈軟。而愈垂下。不合于儀之半徑。欲令堅固。

恐銅加厚而儀不便于用。故用三稜角形之

法。而左右上下之。既堅固。亦復輕巧。則用以合天。使之彼此不相反也。幹之上端有小衡。以十字直角相交于弧之半徑線。下端入弧之中。夫幹及弧。併小衡之上。面皆在一平面。令儀合于本圖。而便測驗故耳。又左右皆有細雲。彼此相連。蓋藉之以堅固。全儀者也。若夫儀之中心及小衡左右之兩端。各定有一表。皆圓柱。左右各表之徑線。相距中幹之徑線。本弧之十度。弧之度分從其中線起算。左

右各三十度。每度則六十分。每一分。又十細分。則一度共六百細分。而每細分。則當六秒。蓋與象限儀之分法無殊也。其弧上有游表者二。其表之平面。有三界線。長孔。孔內之方形。依本法與圓柱表相等焉。夫儀之全體。則用權衡之理以定之。蓋取其重心。以爲儀心耳。至如儀之座架。有兩端。一爲三運之樞軸。一爲承儀之臺。夫三運之器。加于儀之背面。定于儀之重心。以左之。右之。高之。下之。平之。

側之。無所施而不可。故又名百游之紀限儀焉。其三運之器。所以成之者有三。其一圓管。內有圓軸橫入之。便于高下運用也。其一半周圈。其中心與橫軸之中心正同。便于平側運用也。其一立軸。則便于左右運用焉。以圓管定于儀之重心。而半周圈與橫軸之心。并立軸之上端。有小圓柱。以爲平側運之軸。而立軸所容半周之處。則內有山口以容之。外有螺柱以定之。此輕小之儀之最便法也。今

制紀限儀甚重大。側運之則必下垂。而螺柱恐難以定。故于半周弧外規加齒。而立軸旁則加小輪。其徑約二寸。其圓而稜齒與半周齒相入。又小輪同軸。而另加全輪。其全徑與小輪之徑如五與一。與半周之徑如一與二。蓋依舉重學之理轉運之。而輕五倍也。用此法則全儀不勞力而可側運矣。定之則于立軸下端。深入臺上端之圓孔。因儀左右旋轉而窺測之目。可無所不至矣。臺約高四大。其

庀約寬三尺。從下至上。有游龍蜿蜒以繞之。
而紀限儀之制于斯全焉。

天體儀

諸儀之中。其最象乎渾天而爲用甚大者。莫如天體儀者也。蓋天體儀乃渾天之全象。而其爲用。則又諸儀之用之所統宗也。然諸儀中最爲難制者。亦莫若天體儀。爲夫卑肖乎天形。且便于川之爲難也。其難于卑肖天形者。難以取圓故也。其難便于用者。難于周圍均輕。而無偏垂故也。其取圓。則以子午圈。或地平圈爲準。先應分子午圈。劃爲四象限。見第六圖

定兩相對之界。以爲南北二極。每一象限則分爲九十度。而兩極各爲九十度之界。子午圈則以兩面度。及字彼此準對。每一度。以對角線之比例。而另以六十細分。又每一分。更細而四分之。而每四分之一。則當十五秒也。則以游表識之焉。又子午立圈。以向東之規面爲正面。而儀之中心。乃正對于斯。其南北兩極。各作圓半孔。以受儀之半軸。其他半以伏兔圖半孔受之。兩半圓相合。以螺旋轉定。

之。而兩極上下。以圓鋼樞而受儀之全軸焉。
夫欲儀之旋轉齊圓。而畢肖乎天之形體。則
必以子午圈內規面之齊圓爲準也。欲其均
輕而便于用者。則又必以權衡之理爲準也。
蓋權衡之爲義。本乎天行之平耳。夫惟渾天
之恒平行。是以左右上下。無或有輕重之偏
焉。而天體儀之所爲最象乎渾天者。大端正
在于此。輕重學有云。平衡之梁。其心在中。其
兩端加重各等。一端扶之以手。手離自不動。

矣。則天體儀亦然。任意旋轉。手離則儀不動矣。其圓形之心及徑。與重之心及徑。同在一所故也。安儀于子午圈之中。行令其輕。而形令其圓。其象天也如此。此制器尚象之爲第一義也。次之令其準合于地平圈。地平圈其座架約高四尺七寸。而座之上下有兩圈。上圈爲地平之面。寬八寸。于子午正對處各闕其口。深與子午圈側面寬與其規面相等。摭以恰容子午圈。不寬而亦不隘。爲當其可焉。

至兩圈內規面平合。而左右上下環抱乎儀。周圍則須留五分之縫。爲便于安高弧。而進退游表。隨用規器。於地平上面。多作平行圈線。以別度與字之間處。必于劃度處展之。于劃字處縮之。便以長方對角之線。細分宮度。地平之上面。共分內外中三層。內層劃有地平經度。分四象限。而各爲九十度。其經度之上下。則劃有度數字。平距圈線內外界之。上所刻字。以正南正北各爲初度。以正東正西

各爲九十度界。下所刻字反是。以爲測驗時
便。于用故耳。內層則以周渠爲限界。渠之深
寬相等。卽五分內。堪容高弧之足。卽地平經
度表也。自周渠以外。則地平中層矣。其上下
平距圈線者。卽限界。

京師地平日晷時刻也。每一時分八刻。而每一
刻則十五分。午正初刻。卽自子午圈正面南
邊交地平而起。子正初刻。相對于兩圈北邊
相交處。日晷源表者。卽天體過南北之軸也。

但本軸在儀體之中不見。故儀面上。過南北兩極。不拘何圈。俱可以代表也。地平面上。其外層圈線者。卽分定三十二方之線也。此外圈亦分四象限。各有八方之線。亦名風線。蓋地平周圍。從三十二方風之有名者而起。凡定方向。及細心觀候天象者。必應分別之。夫地平及子午兩圈。因在天體面之外。係外圈。此兩圈全備如此。則儀面上之諸圈。可定以爲內圈。前南北兩極當其中。而劃赤道圈。以

四象限分之。令各象界線與子午卯酉四正
正對。次則另用規器。而以各象限初度爲心
以未度爲界。劃四半圈。正對各兩半。相遇于
南北兩極。而成兩全圈。其一定春秋二分。名
爲過極分圈。一定冬夏二至。名爲過極至圈。
二分在黃赤二道相交之界。二至爲黃道緯
南緯北至遠二界。卽二十三度三十一分三
十秒也。故過極至圈上。自赤道緯北之二十
三度三十一分三十秒爲界。而以一象限未

度爲心

道自黃極

用規器作圈而定黃道以二分

二至四象限分之。每象限則三官。每官則三十度。而每度依對角線之比例。分六十分。此爲黃道之經度也。至于赤道則自西而東。分三百六十度。以春分界爲初度。此赤道經度也。兩道緯度。依過分過至兩圈而定焉。次又以赤道南北二極爲心。相距三十九度五十五分爲界。而用規器作

京師恒見界圈。又以黃道南北二極爲心。而黃

道南北各作兩圈。兩圈互相距三十度。各圈所分之宮度數。與黃道圈之宮度數相對。次于黃赤二極。及于天頂。卽地平之極。加匾圈四分之一。以定黃赤及地平各圈之緯度。摠命之曰緯弧。以九十度分之。每一度依對角線之比例。以六十細分之。故緯弧之寬以對角線之長方形。及所刻度數字爲定則。其劃度分。從下而上。卽從黃赤地平各圈之經度。畧定初度而起。緯弧各有橫表上下任意轉

移之以定緯度之分。黃赤二道之緯弧。上端有圓孔以安之。于本極。下端有一圓弧。以十字直。角形橫交之。以密合于本道之經度線焉。蓋緯弧必以直角交本道之經圈。橫條之長。約緯弧之二十度。其寬與緯弧等。若地平之緯弧。亦名高弧另有製法。蓋高弧及天頂。悉依北極出地度安置。故子午圈上。抱合天頂。另有游表。中開一長方口。以入子午圈。下出小螺釘。安貫高弧上端不脫。表正面另有螺旋。

轉可以任游移而定之于天頂。高弧下端則另有表。如平足與地平上面平行。足底有如突起之形。入地平上周渠。如坳入之形。而以直角交地平經圈。以定其度分也。其黃赤二道經緯之度全備如此。則二十八宿星座等天象有定位矣。有次第矣。夫星宿依黃赤等各道之經緯度。布刻儀面之上。以本象線聯之以大小六等印記別識之。以黃道十二宮次界線。各于本宮次摠歸之。蓋黃道每一宮

界爲心。相去三宮爲界。用規器作過黃極各大圈。凡天上諸星諸點。在一宮兩界線中者。卽命其在某宮之度分也。從來歷家造星球星圖星表。必以測驗爲據。而定其經緯。測驗愈久愈密。古人但以目之所見畧定星象。以東西南北摠別之。後代歸之于黃赤兩道之宮次。又後歸之于宮度。今世猶爲加密而定其經緯度分秒矣。蓋歷年愈久。則測驗愈合也。夫先代如元明之儀。頗爲粗畧。用以測天。

往往不能定諸星經緯之細微。今新制之六儀。則渾天大小諸星。俱可攷測而定。此近古所未有也。仁照現在之星表星圖。新儀面上普列一天之星。過此以往。以六儀互用而攷測之。則于數年攷測之後。而更加精詳矣。夫星球最爲合天象之儀。星宿列其上。與列在天者無異。則一舉目而識之矣。若舊法之圖。星球所布列星。天上所無者。或不分別其大小之等第。則儀殊不象于天。而觀天者之目。

反混亂而失據矣。如星球上。凡有密點。皆
如天漢積尸氣。傳說牛宿第四第八星等。皆
密合微小之星。止用遠鏡窺測。可分別之。舊
法疑其非星。因稱爲氣耳。又子午圈外規面
上。安有時圈。其全徑二尺。以北極爲心。其上
側面。分二十四小時。每時四刻。共九十六刻。
每刻十五分。每一分以對角線之比例。又以
六分之。則每一分當十秒也。其指時刻之表。
以螺柱定于北極樞。因能隨天體而轉。又能

隨本螺柱左右自轉。以便對於各時刻分。前代如元明以來。所造星球。止可于一地北極之高度用之。今此一天體儀。可通用以測普天之下之天象也。蓋子午圈下。制有銅象限弧。其寬二寸五分。厚一寸。釘于子午圈之西側面。其外規面有齒。規齒底之下。另有長齒之小輪。下齒與上齒相入。小輪之同軸。另有大輪。其外規面之齒。與柄軸上小輪之齒相入。而大輪與柄軸小輪之比例。爲四分之一。

焉。故兩輪互相爲用。一人左右轉柄軸。則天體隨之進退。其北極任上下於地平圈。而依各省之本度也。夫地平圈切用之處。在于平分天體之兩半。而天體左右。不拘何以旋轉。而其周面上所劃在黃赤等大圈者。半必在地平之上。半必在地平之下。而分秒無差。故其承儀之座架。南北二方。有二螺旋轉。以便用。任天體上下於地平若干之度分。無不可以對照焉。外此著有黃赤二道南北兩總星。

圖并簡平規總星圖解。蓋互相發也。

窺表

儀之所爲合天者。端在于分之法。與窺之法也。
蓋分之務極于細。又務極于均。窺之務極于
密。又務極于確。此二者。造儀之大要也。分法
詳見後篇。今就諸儀通用之窺法而言之。蓋
窺法所用之具。則不離乎窺衡與窺表而已。
夫窺衡。卽古之窺管。窺簫之類是也。有指線。
有度指。見十圖指線者何。衡中指儀之經線也。
度指者何。衡之杪。而卽指儀之弧上之線。以

指定度分者也。蓋儀之中心。當天之中心。儀之經線。當天之經線。凡測天之法。必從天之中心。以天之經線。爲窺目之視線。指定夫在天之度分也。窺表者。窺衡兩端直立之表也。有上有下。下表於窺目近。而上表則於窺目遠也。凡過儀之中心圓柱。或兩極相連之圓軸。或儀之經線。皆可代上表。下表有方形。有圓形。有恒定表。有轉表。有游表。凡兩表須相等相向。而其上下左右之窺線。須與儀之指

線互相平行。蓋平行則各以相等角。交儀之
經線角等。則度分亦等。而無所差忒矣。

地平儀之用法

測日或測星。須于地平圈內旋轉中心表。向于

本點。

凡謂點者。則日月之中心。衆星之所在也。

而令橫表上。所立

勾股形之兩線正對之。蓋勾股兩線。如股與

弦。或勾與弦。并人目本星。四者相叅直。則橫

表之度指所在。卽本星地平之經度分也。或

從東西。或從南北起而數之皆可。若當日光

照灼。難用目視。則于白紙上。以勾股形兩線

相叅直之影爲準。若日色淡時。則可用目視

象限儀之用法

象限儀者。地平之緯儀也。凡測日或星。轉儀向天。低昂窺衡。以取參直。卽得地平之高緯度。凡轉動儀時。若其背面之垂線。或有不對于原定之處。則其偏內或偏外若干分秒。必須與其所測得之緯度。或加或減分秒若干。蓋儀偏于內則用減。偏于外則用加也。夫地平而分爲經緯兩儀者。以便于用而窺測爲準。故也。其便于用者。蓋謂兩人同時分測。乃并

向于一點。以轉動而互用之。則赤道經緯度
可推也。並夫日月五星之視差。地半徑差。清
蒙氣差等。無不可推也。

紀限儀之用法

紀限儀者。原以測星相距之器也。其測法。先定所測之二星爲何星。乃順其正斜之勢。以儀面對之。而扶之以滑車。一人從銜端之耳表。窺中心柱表。及第一星。務令目與表與星相叅直。又一人從游耳表向中心柱表窺第二星。法亦如之。次視兩耳表間。弧上之距度分。卽兩星之距度分也。若兩星相距太近。難容兩人並測。則另加定耳表于中線。或左或右。

之十度。一人從所定表向同邊之柱表窺第一星。又一人從游表向中心表窺第二星。其定表至游表之指線度分若干。卽兩星相距度分若干也。

赤道儀之用法

用赤道儀可以測時刻亦可以測經緯度分。若測時刻則赤道經圈上用時刻游表即通光耳。而對之于南北軸表。蓋經圈內游表所指即本時刻分秒也。若經度用兩通光耳。即兩徑表在赤道經圈上一定一游一人從定耳窺南北軸表與第一星相參測之。第一星者之某星經緯度也。蓋測星赤黃二道之度必以顯推隱顯者爲先得之某星隱者爲今所求先得之初星必用日月太白。通求之法見恒星曆指。一人以游耳轉

移遷就而窺本軸表與第二星相叅直。如兩耳間于經圈外之度分。卽兩星之經度差也。用加減法。卽得其星之經度矣。緯度亦以通光耳于緯圈上轉移而遷就焉。若測向北之緯度。卽設耳于赤道之南。測向南之緯度。卽設耳于赤道之北。務欲其準與夫在本軸中心小表令目與表與所測之星相叅直。次視本耳下緯圈之度分在赤道之或南或北若干度分。卽本星之距赤道南北之度分也。若

本星在赤道密近難以軸中心表對之。則用負圈角表定于緯圈之第十度上在赤道或南或北。次以通光游表對之。蓋游表距相對之十度若干度分之數。則減其半。卽爲某星之緯度分也。

黃道儀之用法

欲求某星之黃道經緯度。須一人于黃道圈上。

查先所得某星之黃道經緯度分。

見赤道儀用法

其

上加游表。而過南北軸中柱表。對星定儀。又

一人用游表于緯圈上。過柱表。對所測之星。

游移取直。則緯圈上游表之指線。定某星之

緯度。又定儀。查黃道圈兩表相距之度分。卽

某星之經度差。若本星在黃道密近。難以軸

中心表對之。則用負圈角表。而測其緯度。其

法與測赤道緯法同。若夫天體儀之用法。詳見新法厯書。渾天儀說中。